





唐黃御史公集

三



784





唐黃先生文集卷之六

唐監察御史閩黃滔著

墓誌銘

司直陳公墓誌銘

姬孔之教與日月以懸天顏閱之馨作芝蘭而  
出地可不誅清塵於桂苑揭貞石於松阡敘白  
楊之別生悲風示黃壤之下藏嘉氣者哉漢太  
丘長二十三世孫南安縣尉諱真生處士堯堯  
生大理評事齊忠信篤敬不類今世嘗有白雀

巢其庭宇佳蓮產其池塘識者謂其後必大有  
子九人皆力儒學公其長也諱嶠字延封韶亂  
好學弱冠能文與高陽許龜圖江夏黃彥修居  
莆之北巖精舍五年而二子西去復居北平山  
兩地穴管寧之榻十霜索隨氏之珠然後應詔  
諸侯求試宗伯而以咸通乾符之際龍門有萬  
仞之險鶯谷無孤飛之羽才名則溫岐韓銖羅  
隱皆退黜不已故公自丁丑之及丙申高價馳  
而逸步躡既而大盜移國德公文行之深者安

州鄭郎中誠孫拾遺泰嘆而勉之久乃持輦下  
之屈名適蜀中之貢府致鄉士倒屣場席開路  
清風旣爾竊爲權官沾諸將求識而薦之公時  
已出經試比言之者

缺一字

築帟而亡是舉光啓

二年收開三年榮登故相榮陽鄭公禮部上第  
大哉公爲人謹信居家純孝事繼親彌善廬先  
君墓泣血有聞其所爲文扣孟軻楊雄戶牖凡  
三百篇有表奏牘頗爲前輩推工且大唐之設  
網士得之於是者歲幾人焉矧復有避宦者之

節若走衝虛之車焉榮陽公自以得人其春首  
門人脫麻攝京兆府參軍司空太原公帥閩解  
榻以字一缺辟之爲大從事受大理評事兼監察  
御史今府相繼擁于節旄益賢其參畫奏大理  
司直兼殿中方期輟從藩屏入踐諫垣不幸寢  
疾浹辰不起矣享齡七十有五光化二年十月  
三日嗚呼將來失其龜鏡斷者喪其般倖雖登  
大年終恨朝露三年庚申正月十七日丙午葬  
于泉州莆田縣崇教里北平故山禮也公兩娶

魯國林夫人榮陽潘夫人其子三人仲曰說買  
石太湖刊文愚與公同邑閩越江山莆陽爲靈  
秀之最貞元中林端公藻冠東南之科第十年  
而許員外稷繼翔其後詞人疊疊若陳厚慶陳  
泛陳黯林顥許溫林速許龜圖黃彥修許超林  
郁俱以夢筆之詞籟金之學半生隨計沒齒銜  
冤曠乎百年而公追二賢之後七年而徐正字  
寅捷八年而愚缺一字莫不江山之數耶倚歎昔  
之負高才不以位而碑者襄陽惟孟先生焉今

也累懿德不隆位而碑者以陳夫子始愚沾巾  
宿草無媿抽毫其辭曰

江山之秀鐘乎人純孝高節并其身掬茲二美  
摛爲雄文以之登桂科以之列蓮賓斯爲君子  
誰曰未仁烏乎九原宜樹貞珉

祭文

祭陳侍御嶠

維光化三年歲次庚申正月庚寅朔十五日甲  
辰將仕郎守國子四門博士黃滔謹以清酌之

奠敬祭于侍御陳君延封之靈伏以靈閩之江  
山莆稱秀絕首武德之科級自貞元之英哲其  
後繼生碩儒疊疊鴻都交懷荆璞互握隋珠皆  
指期於拾芥終慟哭於彎弧洎宣皇之後年則  
夫子之斯出持曾參之孝行袖孟軻之文帙薦  
賦諸侯上書聖日射宮而勁挺弦矢藝圃而歲  
蕤華實難亨者吾道難偶者至公管仲三奔非  
戰之過孫弘十上蓋時未通七千里而辛勤上  
國二十年而惆悵東風人皆一一以興憤我獨

黃先生集卷之六  
孜孜而養蒙既而鳳闕飛塵龜城挂榜儀曹方  
急於中興權宦輒窺其上賞殊不知楊吟誦於  
犬子景薦延乎商鞅古爲不然吾肯斯做誰不  
奇夫子之節誰不高夫子之名冰霜却污松柏  
居貞渭水之釣有守武城之逕寧行逮夫岷峨  
歲改岐雍煙清天子復舍元謁見有司新都省  
權衡巍巍令問赫赫嘉聲遂從寰海迴翥蓬瀛  
振輝光於甲乙開道路於孤平望高而先脫麻  
衣家遠而須榮鄉土十二人林君茂躅一百年

莆邑大數君侯設醴以前席里巷拜塵而如堵  
雷車轘轘鶴駕翩翩初命就門見東周之三語  
前程不日俟西漢之七遷旋以孔罇引滿徐榻  
解懸白璧黃金而疊矣玳簪珠履以加焉列藩  
所得者賢才古人所重者知己既將推珍於席  
上豈獨矜詞於雪裏莊周說劍則韓魏呈罇郭  
隗昇臺則樂鄒覲止繡衣曜日聽馬嘶煙飛詔  
而賓階次第假途而棘寺盤旋莫不漢帷駐策  
薛石畱牋從容渥澤寵異淹延胡言薤露忽敗

椿年嗚呼石火風燭驚波逝川聖賢之不免矣  
古今之共痛焉滔江鄉則中外親姻帝里則參  
差硯席干名而後乎一紀論友而仰乎三益蟬  
槐結念幾同京洛之愁鷺柳看時各署神仙之  
籍別來輦下歸自甌中塵忝而却詵桂綠因依  
而王儉蓮紅斷金益固投漆攸同見行藏於柱  
史論倚伏於塞翁實期以始者文場之懿德以  
邇來使府之清風伏蒲北省起草南宮更雪當  
時之寃滯少爲吾黨之隆崇是何天之喪道之

窮恩恩大夜默默玄穹滔復曉夕以思江山之  
事林君則以合浦垂名夫子以申秦得意高步  
斯振宏規靡異前輩曠世後來遂志俱蟠使下  
之栢俱擅乙中之二

林端公貞元七年首閩越  
科第以珠還合浦賦擅

名後十年莆邑許員外榮登自此文學之士繼  
踵而悉不偶時曠百年始鍾於廷封其文以申  
秦續篇擅名後六七年徐正字及第兼滔塵忝  
林端公曰廷封榜皆第十二人皆開路於後人  
皆終使府大判官判官皆  
栢臺林荆南廷封閩中也推是言之豈偶然耳

賢哲相望今昔一致嗚呼廷封昨日而冰壺仙  
霧今辰而丹旄芻靈雖死生之理能一終痛傷

黃先生集卷之六  
之懇罔寧况以平生樹德幽宅刊銘無慙郭泰  
之賢牋毫曷措爰枉趙歧之寄涕淚交零水咽  
雲愁風悲日暮精靈一閉於泉壤歲月空蒼於  
隴樹椒壺略備蘭俎聊具申永訣於斯言庶冥  
感其誠素嗚呼哀哉

祭先外舅

伏以彼蒼者穹禍淫福善噫何斯言之或謬歟  
錢鏗壽而頽淵天盜陌爛而嵇康刑屈原寃而  
文考溺冉惡疾而左喪明胡其然哉胡其然哉

伏惟明靈柳蔥松峭山嶷鶴孤落落君子行行  
魯儒始者辭鷗西邁希鵬北徂高高蟾桂赫赫  
鴻都和贄之寧三泣宋盧之俟一呼而以氣直  
志大數奇道汗大中季之計車奔走咸通際之  
名路崎嶇於是涕唾聲華毫釐簪笏枕中罷竟  
於名位壺裏別窺於日月東尋玉籙則龍虎差  
峩南訪金沙則羅浮突岷北固風清西陵月明  
蘭舟泊岸金磬飛聲塵埃謝傅之叔姪夢寐茆  
家之弟兄古觀秋住靈蹤日行松下之齋宮肅

肅雲山之醮火熒熒鑪燃北癸鼎化西夷羽人  
傾蓋府帥投誠說浙西周體范居陶象端適衛蓋媾  
嫁之須了匪貨財之所繫愈高雲鶴之逍遙益  
笑匏瓜之繫滯何武江都蕭牆禍儲羊腸莫守  
蝸角旋孤說淮南高蕭條陳蔡之圍聖賢大困惆悵  
崑崙之火玉石俄俱綿邈吳山蒼茫閩海遽聲  
沉而響絕存時移而歲改絡秀愁積孟光泣倍  
山頭之鶴駕無覩水底之鯉書空待宅相征輪  
梁園洛濱見徐甲之移主知伯陽之蛻身海山

失翠煙樹亡春洎竊惟早歲忝拜清塵蒙以拾  
青相器投漆相親鑒義之必晉朝名士識陳平  
爲漢代英臣爰將淑女俾結嘉姻十載不攀於  
桃李兩誠空貫於松筠愚以感明靈之殊義戴  
明靈之至仁金重季布枝輕却詵逡巡東越拖  
擲西秦實期歸釣巖灘終棲鄭谷戶外山碧樽  
中酒綠將仰止於樂水冀參差於衛玉豈意寂  
寥音信髮鬢幽明聖人之齊始卒君子之一枯  
榮天上之鵲橋宜度人間之鴛被須成開簾鳥

轉迴轡蜩鳴東牀則黯黯愁色南渭則哀哀哭  
聲嗚呼哀哉平生氣槩昔日忠貞龜齡曷味駒  
隙斯驚在物之理豈人之情愚輒疑道家有形  
全氣全兵解木解考斯事矣或其義也不然者  
胡埋南祖之蛇罔念北翁之馬嗚呼哀哉列塚  
開吁重泉九原古之所制今也斯存伏惟明靈  
魏夫人遺蓮鋒而所喻葛仙翁墜竹枝以爲諭  
固以神遊蓬島洞入桃源然則不樹松柏罔貽  
子孫是用葬喬山之冠劔招湘浦之精魂滕公

啓室宋玉申言曰楚山青兮淮波綠劉雞飛兮  
隨鷁覆遺蹤脫屣辭彼俗楊柳霜多不堪矚螺  
江淺兮甌山陰繼昇天兮徐董任風爲輪兮雨  
爲轡東歸來兮北追尋陳桂席兮奠椒漿樹馬  
鬣兮開壽堂千秋萬歲兮舊江鄉魂歸來兮山  
之陽詞咽淚迸猿悲鳥傷東波送恨西日沉光  
雪耀霜明而莫覩芝焚蘭蕪以空芳孀妻捧奠  
出女尸喪嗣男而杳杳江嶺鄙子而明明肺腸  
劔以求心而克許樂以悲告而寧忘願明靈之

冥感鑒蘋藻於壺觴嗚呼哀哉

祭崔補闕

道融

故右補闕博陵崔府君之靈惟靈大唐有進士科無巖穴詔故鵠版之降不易其人元和之起也則有陽諫議城凜凜清風其不起也則盧諫議全昭昭高道一以權豪之忌空福道民一以堯舜之世但樂箕穎其後陸君沔以忠勳應召惠君寔以忠諫赴徵未委起草伏蒲何如人也洎博陵崔君之生也迴稟高奇兼之文學近則

繼李飛之蛻隨貢遠則同毛義之志奉親東浮謝公舊州式避戈戟遁於仙巖濬谷克業經綸而以美酒肉羶澤馨川媚五辟三顧懸榻開樽不辭小國之權蓋切高堂之養既而大君之思夢說四輔之急薦雄繫三詔而就門參七人而列職仲舒謁帝必演春秋呂望投竿定爲師傅奈何龍蛇起陸烏兔無光莫扶劉氏之宗祧空泣袁安之涕泗甌中越絕養素守蒙賢王之結嘉姻時議之期良輔豈意皇天不祐白日無憑

黃先生集卷之六  
消渴之函茂陵少微之人瑤桂芝焚蘭蕤梁壤  
山頽雖人生之有定期實土德之爲不幸嗚呼  
閩中二月烟光秀絕脂轄赴闕鯢鳳嘈噴其猶  
南浦魂斷北梁涕咽而況昨日軒車今朝塗芻  
唱薤露以出門飛粉旌而戒途五離擇日九泉  
卜居其在樵蘇其在博沽至於路行尚皆悲吁  
矧其嶽嶽之曰男子鏘鏘之號魯儒識通龜策  
握耀蛇珠數百篇有唐之詩數千字中興之書  
國風騷雅王佐謀訏沉光之猶衝斗垂翼之未

搏扶賞志歿地其痛何如雲物爲之無色剛忍  
爲之不愉滔飲風永嘉傾蓋無諸多君於士元  
廊廟待我以叔度陂湖交言旣異投分斯殊方  
俟彈冠仰修程於霄漢誰云執紼悲落景於桑  
榆豈鬼神之害良善而吉凶之昧賢愚顏回先  
死盜跖後殂世之災眚生之毒痛愴恨風燭淒  
涼隙駒肴匪豐俎酒匪馨壺歎松蒿而永往託  
蘋藻以聊舒明靈有感鑒而歆歟已乎已乎噫

噫

黃先生集卷之六  
祭陳先輩

鼎

維光化四年歲次辛酉正月二十七日祭于陳君之靈閩山秀氣魯國清塵天之授受鍾我仁人卓矣生世學而立身衛玠則旁輝其舅曾參則大孝於親始者隨計歸越上書入秦擅價而侯門傾動呈功而鳳藻精新咸通之年九霄也鷓路乾符之際萬仞也龍津旣而甌嶺經兵蜀川迎帝匪無隨駕之懇實切問安之計肩負焦飯志銷丹桂雖深藏豹之誠難遏化鯤之勢都

堂昔日困一千輩之交鋒大國中興作第二人之登第杏園醉後華表歸時往歲井邑茲辰羽儀旋屬姑蘇積疊勾踐興師於是板輿避地草檄從知百越之江光海湧四明之山翠參差長鯨旣剔逸足難羈東別朱門南還故里一朝而奄至泣血三載而茂聞見齒仲由此後千鍾之祿悠哉毛義終身一檄之榮已矣修程不顧盛德逾馨田園草綠戶牖山青與夔龍而抗跡追園綺而忘形且期齊鶴算壽陟龜齡是何修短

黃先生集卷之六  
三期莫測吉凶之闕難局明神罔祐大禍斯丁  
士林慘怛詞苑伶俜滔始自童年至于壯歲江  
鄉爲竹馬之友京輦作谷鷲之會三朝被刑棲  
遲泣荆璞之艱十上遭時次第到瑤蟾之內誰  
言倏忽遽嘆存亡痛人琴之俱絕緬膠漆以空  
傷嗚呼用新平生德行曩昔文章近則孟浩然  
雖人間不仕遠則卜子夏乃地下爲郎誠以高  
科而貞退固從陰隲以舒張遊水東流跋烏西  
匿昨辰而椒桂獻酬今日而藻蘋滴瀝且彭祖

之延永壽亦至銷磨而巨卿之哭故人得無悽  
惻况乎東西多故南北程遙不得親隨薤露送  
別松塋旣闕殷勤而執紼空將嗚呼以沾纓謹  
以依稀蔬果十二精誠願冥符於盼蟹申永訣  
於幽明

祭林先輩

用謙

維光化三年歲次庚申十一月日敬祭于林君  
執光之靈惟靈夫渥洼之足以千里之爲程已  
馳之而俄沮嶰谷之音以六律之爲府旣叅之

黃先生集 卷之六  
而忽泯夫不永其終始何痛如之嗚呼林君得  
以言矣君負相如之詞賦慕郗氏之科名一紀  
秦城千門襍刺雖衆口太馨其鳳藻人罕如焉  
而三春累困於鸞喬數何奇也然則女貞而十  
年必字藥靈而九轉湏成果契至公克昇上第  
旣已東堂得意南國言旋龍珠則動彩於握中  
鴈序則增輝於天際將冀盛清風於吾道豈期  
歎逝水於人生屈原之難問者天蔡澤之不知  
者命螺江煙景方翻丁令之羽毛駒隙光陰俄

啓曾參之手足誠壽夭靡移於夙契且鬼神何  
害於善人禍福吉凶悠揚曖昧淒涼物理慘怛  
人情今則壽域斯開貞魂永罄瓏頭水咽山上  
雲愁鄧攸之繼世無兒語畱身後崔曙之遺孤  
有女詩在生前雖衰盛之同休亦存亡之至痛  
滔京關進退硯席參差幸忝先鳴彌欣繼捷未  
賀桂枝之入手忽從薤露以傷心修短有茲吁  
嗟何極靈輻戒路丹旄飏風遠寓丹誠聊陳薄  
奠願垂冥感鑒歆於斯嗚呼哀哉

祭右省李常侍洵

惟靈金石呈姿陂湖稟量伊彼昭代生乎德門  
膺河清嶽峻之期擅賈虎荀龍之號時稱最怒  
家謂無雙月中則桂樹連枝日下則駕行接翼  
故得隣家醜婦競嘖西子之眉洛下諸生皆掩  
謝公之鼻爲夫延之領袖定千古之風流旣而  
魏闕飛塵蜀都迎駕雖則急賢于行在而志作  
賦於閒居畱連霽水之煙波容與松江之歲月  
其奈珠以川媚蘭於澤馨從吳苑之琴樽疊堯

天之雨露金臺蒲省驄馬螭頭誠幾三顧以就  
門猶作八元而在野其後七昇赴命二妙對敷  
天駟呈材蛟龍得水入鼇山而侍從登鳳閣以  
優游名由實生位以德舉天子乃擢王褒爲諫  
議昇孝若於貂璫前彰潤色之功後養燮調之  
業旋以攬槍未落歧雍多端忘越嶺之崎嶇慕  
荊州而倚托東閣之畱連斯重北轅之行邁方  
營誰料彼穹者天俄奪之魄漳濱一鬼驟苦劉  
禎殷氏兩楹遽鍾夫子山頽梁壞壁碎芝焚雖

黃先生集卷之六  
人世之死生實七林之摧沮今以湖湘梗澀伊  
洛迢遙北邙之路連天松楸莫附南巷之號至  
血丘壠權儀煙雲慘澹於原頭猿鳥悲涼於林  
際滔曩從上國獲戴殊私近慶外藩薦承厚顧  
每佇十旬之入拜寧期二豎以來攻彭殤雖謂  
其同休幽顯其如乎永隔靈輻戒路丹旒飈風  
昨辰而椒桂獻酬今日而蘋繁滴瀝人生到此  
天道何言雙淚空流九泉無曙東波嗚咽西日  
蒼茫輒寓茲誠謹陳薄奠敢祈冥感髣髴歆斯

祭司勳孫郎中

惟靈趙璧呈姿隋珠稟價爲乎國器生之德門  
劉家則三叔揚芳馬氏則五常擅美故得數枝  
郟桂交茂鴿原一本田荆分輝雞樹理窟則曲  
臺得雋寶人則華省垂名繇是迴拔蘭宮騰光  
水鏡臺推二妙日俟七昇不幸岐雍多艱干戈  
未偃補傾乏石救濁非膠爰攀鴈序於五湖因  
轉驥程於百越誰料皇天不祐彌爾斯縈遽折  
椿齡俄隨薤露山頽梁壞芝蕪蘭焚雖脩短之

黃先生集卷之六  
有定期實簪紱之爲至痛今則江湖梗澀京洛  
迢遙權卜靈岡寓安壽域川上之東波嗚咽雲  
間之西日慘悽大夢莫迴下泉長暮滔早於輦  
轂歷踐軒墻旋振羽於丘門獲陪塵於阮巷顏  
回短命旣恨當年溫氏冥裝復從今日人生若  
此天道何言涕淚空流幽明驟隔嗚呼哀哉輻  
輳明發丹旆晨飛輒憑蘋藻以寓誠用薦塗芻  
於永訣願垂冥感髣髴鑿歆嗚呼哀哉

祭宋員外

故軍倅觀察推官檢校主客員外郎廣平宋君  
希邈之靈惟靈物有盛則有衰人有生則有死  
古今不易之數毫髮無差之理然則厥壽苟百  
壽終則滅厥身苟修身歿名畱是以顏子天而  
其言不朽原壤老而於道何求吁嗟希邈藹然  
清休蘭杜敗而終馥松柏折而終秋德木千尋  
人材八尺負雲鶴於風裁濺陂湖於胃臆旣而  
臺築黃金禮先白壁爲席上之至珍運幕中之  
婉畫洛水波清泉山翠橫優游五府輝映雙旌

兩地之隆崇物望一方之煦妯人情繇是入曳  
珠履出居武城尊俎克彰於令譽絃歌迴振於  
嘉聲才業大聞君恩薦至爰從棘寺以寵陟旋  
慶蘭宮之澤被丹鳳飛詔銀魚受賜雖棠陰蓋  
地能資樹德以行春而醴酒疊觴終以持盈而  
戒意九仙樹碧八座塘深駐清源則一府延頸  
赴無諸則一郡沾襟嗚呼希逸持何道致人如  
斯之欽豈非秉仁義忠孝以行已無是非毀譽  
以萌心者哉奈何晉公二豎漳濱一鬼惡去藥

石之內樂入膏肓之裏冉耕惡疾以相攻長卿  
消渴而不止艾煙百冗藜杖二年禍被三彭之  
所迫靈非九轉以寧瘞嗚呼哀哉石火風燭驚  
波逝水誠修短之無改矣奈痛傷之有等焉芝  
焚桂藝璧碎珠捐至於路行孰不涕漣愚一揖  
清塵偏容瑣質初憐淡以如水後乃投而若漆  
十年之寒暑無變三益之金蘭愈密泊夫秦城  
駐跡儉府叨招竊惟上榻幸忝同寮南貳隼旗  
雖寄懷而稠疊北依龍節終積戀以迢遙沙岸

迎歡津樓送別且言不日之後會誰料終天之  
永訣人生夢幻夫復何言世路存亡難勝痛咽  
嗚呼哀哉昨日而牋函寓意今朝而蘋藻興詞  
駒隙之光陰如此龜臺之學習何斯幽明驟隔  
音信無期加以道路修阻弓旌繫維慟哭寢門  
而莫逮叫呼穹碧以奚爲聊馳一奠之椒桂用  
敘千秋之別離噫噫噫噫已而已而

祭錢塘秦國太夫人

維天復二年歲次壬戌敬祭于故秦國太夫人

之靈天生帝王則若文母方鍾至聖生人臣則  
若陶母方降大賢信夫韜昂宿之耀於曾襟掬  
嵩山之氣爲懷抱豈容易哉伏惟明靈天資婦  
道神授母儀金石不足喻其貞明芝蘭不足表  
其芬馥訓逾孟織智邁謝圍顏氏子則提育聖  
人曹大家則師資諸女旣作閨門之上瑞乃生  
英傑於皇家立曠代之鴻勳擁兩藩之龍節食  
則萬錢調膳祿則三世及親見綵衣則衣錦之  
姿見冰鯉則和羹之味騰輝女史興詠國風推

於古今實無倫比乃由懿德致此大榮嗚呼靈藥難求流光易謝本冀霜松而永壽忽驚風燭以斯零竟成舉世之悲傷空切至誠之號慕洎幸攀令嗣獲忝親隣論交既契於金蘭抹泣乃同於親屬輒陳薄奠用表悲誠敢冀明靈依侷歆鑒

祭南海南平王

代閩王

故南平王之靈惟靈五羊奧區番禺巨壤漢爲列郡唐作雄藩摠百蠻五嶺之殷有出將入相

之盛是故地啓嘉數天生大賢濬六韜三略之才謀韜五袴二天之政術俾其於家受詔衣錦馮牙控二十四州之繁難當二十八齒之美茂光揚千古冠絕一時鍾其明靈其昭昭矣至若恢張霸業揚歛清波臺陟九層靡慚郭隗劔提三尺授自呂虔爰持副貳之雄姿遂領節旄之重寄繇是澤施甘露令肅秋霜撤文房武庫以連雲騰逸氣英風而偃草上榻則阮瑀下賢則左車從善則軾閭宣威則斷案故得越伏波之

黃先生集卷之六  
銅柱獻款而來感鄂公之鐵鞭呈祥以見火山  
改色珠浦生光無煩處默之酌泉大鄙趙陀之  
累土然後鳴鐘出入調鼎昇聞致交趾之封疆  
歸石門之教化九遷渥澤克居浴鳳之池雙立  
節旄遠過跼鷲之水雖士鮪列第兄三地山簡  
兼荆湘四州語未同年事推曠世嗚呼是何才  
德之若彼功業之如此而彼穹者天不壽其齒  
畢雲龍之契會與龜鶴而等倫矧天子方欲使  
降皇華恩宣金冊表裏東周之盛旌崇南越之

隆胡二豎之亟攻竟三醫之莫救泰山頽壞俄  
興孔氏之歌漢水淒涼遽罷羊公之市實國家  
之不幸實藩鎮之不幸某早塵興國旋忝睦隣  
雖瓊樹之未親若銅盤之已接方定金蘭之至  
分豈期幽顯之驟殊况以幸結良姻累交專介  
幕下崔員外昨馳禮幣嘗詣門墻爰蒙執手之  
權弘敘親仁之旨今則遽悲存歿益歎彭殤故  
將荐舉征塵躬申薄奠九泉注望於歎逝以難  
勝五月指期表同盟之必至嗚呼哀哉曩馳羔

黃先生集卷之六  
三  
鴈今遺蘋蘩伊人事之有茲顧痛傷而何極然  
則荀龍賈虎大馮小馮雖嗟松壠之長歸終慶  
荆枝而繼茂永言歡好寧息初終幸明靈之一  
臨鑒此丹赤嗚呼哀哉

唐黃先生文集卷之六

唐黃先生文集卷之七

唐監察御史閩黃滔著

書

與王雄書

蒙示盛文拜納之日焉可無言滔不業文誠可  
儷偶其辭以贊方寸既再而思夫儷偶之辭文  
家之戲也焉可賚其戲於作者乎是若揚優喙  
干諫舌啼妾態參婦德得不爲罪人乎是乃掃  
除聲律直寫一二強名曰書幸垂聽覽頃越之

黃先生集 卷之七  
芋工遊蜀之錦肆錦工以之示肆人皆哂越工  
曰誠紅雪之與梭霞異諸然其經緯之如此文  
章之若彼咸言其極滔今獲閣下之文雖莫我  
知亦庶幾於越工之言蜀錦至如典謨之比寧  
敢輒言若復韓校書兩寓沈先輩永崇高中丞  
安邑劉補闕已上十篇書指陳時病俗弊叙述  
飭躬處已講論文學興廢指切知已可否雖常  
人俗士聞見之亦宜感動况吾曹乎則知綿十  
舉而未第者抑有由也夫以唐德之盛而文道

之衰嘗聆作者論近日場中或尚辭而鮮質多  
閣下能揭元次山韓退之之風故天所以否其  
道室其數使若作騷演易皆出於寤愁也復何  
疑焉今之人皆謂番禺駢寶貨遊者或務所獲  
滔之來也得閣下之文爲至寶奇貨克所獲豈  
不厚於它人哉願閣下脂韞躍轡薦計貢闈高  
取甲乙然後使人人知斯之寶貨異於是也元  
次山韓退之之風復行於今日也無令鄭濬孫  
泰季瑞閔廷言陳嶠數公寂寞而已幸惟志之

不宣滔再拜

答陳礪隱論詩書

隔違之久每思陸凱之風雅馨香故人秦樹吳  
 江梅花一枝為之寓滔無陸君之風雅有故人  
 之馨香越山台嶽去年輒以詩八首為之贊昔  
 陸氏茂范君之報今滔切希叟之瓊瑤不知何  
 以勝據焉况四始六義之莫備匪萌是望伏蒙  
 希叟錫以長牋飾之過詞不勝其驚悸而後踴  
 躍也敢一二陳之滔始者匠故交之為詩

希叟劉咸

通季初貢於小宗伯試禹拜昌言賦翌日罷特

持斯賦於先達之門忽叨見錢之目

俗云以詩為末錢而

市物以賦為持錢而市物

是時張喬許彬林希劉皆咸有詩

名而退飛不已滔既竊其目尤疹二三子落空

拳之所不敢俟終日遂更以賦數年以賓榻之

無才畫勝景之多餘暇不能忘情於舊輒薦披

榛焉予以寓誠敢期希叟之是知乎錫以長牋

飾之過辭初捧之而驚悸旋諷之而踴躍踴躍

之謂如見古賢焉何也希叟示以先立行次立

言言行相扶言爲心師志之所之以爲詩斯乃  
典謨訓誥也且詩本於國風王澤將以刺上化  
下苟不如是曷詩人乎今以世言之者謂誰是  
如見古賢焉况其籠絡乎天地日月出沒其希  
夷恍惚着物象謂之文動物情謂之聲文不正  
則聲不應何以謂之不正不應天地籠萬物物  
物各有其狀各有其態指言之不當則不應繇  
是聖人刪詩取之合於韶武故能動天地感鬼  
神其次亦猶琴之舞鶴躍魚歌之遏雲落塵蓋

聲之志也琴之與歌苟爾况惟詩乎且降自晉  
宋梁陳之來詩人不可勝紀莫不盛多猗頓之  
富貴疊隋侯之珍不知百卷之中數篇之內聲  
文之應者幾人乎大唐前有李杜後有元白信  
若滄溟無際華嶽干天然自李飛數賢多以粉  
黛爲樂天之罪殊不謂三百五篇多乎女子蓋  
在所指說如何耳至如長恨歌云遂令天下父  
母心不重生男重生女此刺以男女不常陰陽  
失倫其意險而奇其文平而易所謂言之者無

罪聞之者足以自戒哉逮賈浪仙之起諸賢搜  
九仞之泉唯掬片冰傾五音之府只求孤竹雖  
爲患多之所少柰何孤峰絕鳥前古之未有咸  
通乾符之際斯道隳明鄭衛之聲鼎沸號之曰  
今體才調歌詩援雅音而聽者懵語正道而對  
者睡噫王道興衰幸蜀移洛兆於斯矣詩之義  
大矣哉若滔也誠未足與言而已矣自向叨希  
畋珠白金穴口諷心降之言其復家傳與言身  
周雄文者乎乃惶惕銘戴之無窮伏惟察而憐

之不宜滔再拜

與羅隱郎中書

故表文遺文盛序古人之重存歿爰捧諾金感  
涕之誠實刻肌骨然以郎中十五兄相逢京輦  
得志金蘭雖備熟於行文恐未周於平昔而滔  
以內外之戚始終所詳敢以少才爲之前序誠  
以麟經下筆諸生而不合措辭而史馬抽毫漢  
代而還陳別錄伏惟慈造必踐前言西望禱祈  
可以鑒料

啓

南海韋尚書

滔伏念高爲碧落詎側管以能窺深作滄溟固  
持蠡而莫測焉可愛賚瓊智直杖小才叙昂宿  
之鍾蕭述尼山之降孔旣將越禮誠可加刑然  
則有曠代之遭逢獲千年之際會設若苟扁辯  
囿內退言泉不惟上負於良時抑亦下辜於卑  
志是致齋身擲管沐髮裁辭伏惟尚書象外三  
山人間七寶體天地方圓之製法陰陽昇伏之

機自從見作人龍翔爲鳥鳳騰輝瑞謀流慶皇  
家文章則游夏固遷事業則伊臯周召飛揚天  
上踐履朝端且自古六官所重莫先於吏部逮  
今貳職所難無出於侍郎而尚書五陟東西兩  
司詮管矧復品量庶彙選度羣材載萬乘之安  
危繫四方之休戚晉魏則大難斯地國朝尤不  
易其人歷數除書少聞再命朝廷不欲止於鴛  
省便入鳳池須加分閫之尊用飾作霖之盛特  
以番禺巨壤南越名區外控蠻陬旁通番貨昔

者石門酌泉之事合浦還珠之風日月遷綿規  
程革易以尚書勵辭玉留錢之節執投香載土  
之心用將揭二賢廉潔之波新五嶺崎嶇之俗  
俾以佩豹韜而直下建龍節以遐征非止鎮臨  
且申龜鏡昭然足驗儼若可觀然後飛驛騎以  
徵黃降鵠書而命說恢張帝道陶冶生靈所以  
知高祖創基太宗纂業更得無疆之祚仍歸有  
截之風何以言之伏以尚書萬頃包含千尋峭  
拔膺嶽峻河清之數切飲水食蘗之誠識洞古

今居無喜愠將以鏘履聲而朝紫殿擴心秤而  
啓洪鈞自然道臻於堯舜義軒時復於禹湯文  
武百蠻向化萬國歸心雖在愚蒙亦能辯識而  
滔器同魏瓠凡若莊樗握無蛇口之珍額有魚  
身之點今者遽持幽賤獲覲旌幢兢營方忝於  
拂塵獎遇旋叨於薦賦且凡開場試士就鋪屬  
詞從物外之課虛向燈前以應限縱若仲宣閣  
羣公之筆長卿量陳后之金空有所長或聞未  
至况滔雖勤篆刻且昧精奇張平子固合陋都

陸士衡所宜撫掌寧期尚書親迴嚴重庭賜褒  
稱變泥沙爲丹腹之姿植管蒯作芝蘭之秀魯  
史驟榮於一字晉庭俄採於片言超越尋常震  
驚流輩况方今武功草偃文教風行計奔歲貢  
於九州榜擢詞人於都省至如生於草澤來自  
溝塍或能有闕文中甲乙求登殊尤選蓋止於同  
人延舉先達吹噓未嘗有聖日名侯大朝重德  
面開金口首借丹梯以此推言便宜自賀瑤枝  
玉榦虛扁皓月之中羽駕雲裝寧遜碧霄之外

已知蹇步可造遙程藉以宇內跡單天涯親老  
一旦有茲殊遇得此吉祥買臣何愧於負薪毛  
義實榮於捧檄感深唯泣喜極翻驚瀝膽隳肝  
空寓鄭莊之驛糜軀碎首何裨元禮之門攀謝  
兢惶罔知所措下情無任戰越悚惕屏營之至

薛推先輩

滔體物非工屬詞無取每欲効嘖於越女常思  
裂撰於靈光今者先輩提江筆以雲飛擲孫金  
而羽化賢愚塞望遠近騰聲凡是懷刺來人操

觚學者莫不竟爲市詣爭作鏡窺所以耻不遊  
門勇於執鞚遂投鄙拙上瀆精奇佇聆架屋之  
譏莫俟披沙之諭豈料茂聞撫掌讎獲知音林  
先輩至伏話仁恩超越涯分對彼鸞遷之侶當  
于鳳集之時遽起蘭言爰開金口大垂激發曲  
賜吹噓榮邁序都事逾折簡傾身聳聽跼影瞻  
風如飛冰雪以清心若韻笙簧而到耳感深旋  
泣喜極增憂未知腹蟹行蹤巢蚊寓跡獲采片  
言於叔向何酬一字於仲尼雖切朝暉尤加夕

惕然而伏念近世以科網英髦榜張取捨雖例  
從都試實採自衆聞故其負藝而來懷才以至  
是皆闔投哲匠神拜先鳴苟有所稱便馳殊譽  
然後方冲桂月遞躡蓬山如滔今則有此遭逢  
受期獎錄來從特異出自非常便可釋疑永將  
去惑雖慙陋質粗抱丹心旣得地以戴丘倍推  
誠而倚玉在面陳而莫盡於筆寫以寧周攀感  
依投不任榮懼謹詣宅祗候起居陳謝

刑部鄭郎中 二首

酒學異生知才非夙構雖叨進取莫俟遭逢郎  
中模楷詞林楸航名路每慮或遺於片善常憂  
不採於一言比者伏蒙曲念虛蕪榮流咳唾誨  
以磨鉢未至刻楮非工真心於雪夜花朝空徵  
六義屬意於國風王澤罔造二南將令罷課緣  
情迴從體物伏自穰城去騎灞岸歸蹄時邁青  
陽景融朱火於是凝神扣寂閑跡探幽蓋希副  
非次之恩知非敢切平生之志業昨者伏遇南  
宮拜命北闕朝天豈唯上賀於高翔仍喜旁陳

其末藝永期指教畢願攀依而以淺近懷慙雕  
鐫積愧前而復卻決以還疑空眷戀於門墻竟  
遲迴於書幕今則難逃皎鏡須詣平衡冀分妍  
醜之姿式定重輕之品伏惟特固朝暉之旨俯  
憐夕死之心薦賜發言重將辯惑臨風股慄伏  
紙心冲傾寫依投不任激切試賦一軸謹詣宅  
祇候陳獻

又

伏惟郎中樂府至音儒家上瑞既負雄文於卓

絕仍搜律韻於精微始者袖入名場騰於人口  
以謂若生逢孔氏偃商則失於四科出值毛萇  
周召乃慙於二雅實已當千莫讓而又恥一不  
能復以餘波濡於體物字字並凌雲之勢篇篇  
皆擲地之聲大使前哲懷慙專工積愧滔業非  
精至藝本雕鐫猥蒙仁恩曲賜借示自旬日已  
來齋心繕寫沐髮吟哦愈盡頭風沉成心醉且  
杞國迴船之妙千古所稀而泥金禹<sub>字缺</sub>之奇三  
篇不偶是何摘華若是齟驚失手於斯則知用

兵而管仲三奔射策而孫弘十退豈戰之過蓋  
時所違此乃今古玄機聖賢定數契日月虧盈  
之理等陰陽昇伏之期用以否其道而泰其身  
室於前而通於後逮今一人側席四輔求財則  
煥爛除書飛入雲山之裏昭彰懿德馳歸省闈  
之中徒恨傷麟終幾失馬若無往歲焉有茲辰  
遂使一換暄寒三更揚歷頭居東署首列西曹  
皆是重難無非清顯旣明前事因卜將來佇當  
潤色絲綸翺翔近密輝飾於典謨訓誥啓陳於

堯舜禹湯鎮壓澆風恢張吾道凡居進取皆切  
攀祈况處恩知豈任禱祝所歸公望非自私誠  
賦集謹詣宅起居陳納

謝試官

伏念鸞雞爲鳳有識咸驚投礫叅瓊良知足鄙  
豈可高懸皎鏡迴揭平衡而乃呈六極之陋容  
掛一絲之蔑質得不臨風扇面對景忡心然巧  
冶開鑪莫遺鈔鐵精工執斲不問圓方又安可  
內鑰言樞上華德宇是敢因依借喻一二披誠

滔蜩甲薄姿蟻封微狀學雖勤於刻汁藝則愧  
於鏤冰徒以獻豕辭遼賫花躬魏稅駕而旋同  
飲鼈操弧而果異麗龜遂至千仞禹門額蒙點  
銳兩朝楚國足被荆空竟於豐獄以沉埋誰以  
蜀桐而激發伏惟博士鳴歧瑞質歌郢至音蔥  
籠而張柳風垂迥拔而嵇松雪峭自提攜江筆  
鏗擲孫金投身而傾動龍宮揮手而震驚蟾窟  
時爭墊角俗竟嘖眉今則珠履賓堦玉京羽駕  
欲高飛於魏闕先下歷於虞庠故得槐市三千

杏壇七十依於考擊竊彼飾禡而滔丘錦小才  
路蒲末學既非孺鶚大懼温犀固當絕望超隅  
甘心滅刺然則嘗彈流水罔協鍾聰曾躡浮雲  
莫迴樂顧是亦難叅雅調不號逸羣矧其器乏  
正聲價懸駿骨苟叨明試不偶至公則異時何  
路以致身他日無門而振跡坐為棄物立謝明  
時是乃洞寫血誠仰祈風鑒伏惟博士曲垂厚  
顧猥降隆私將憐其蟀蛤剖胎只自迴旋於皎  
月蟾蜍奮臂無辭頌碎於高車非敢染龜所希

留馬干瀆清嚴下情不任惶惕屏營之至

盧員外溥

昨輒以近試賦輕贖門牆韻匪擲金理宜誚石  
豈期轉禍為福以寸獲長戶部鄭郎中伏話員  
外仁恩大賜獎錄拜聆嘉耗跪對吉辭感惕兢  
惶進退失措實以從古干時之道至今取第之  
由莫不路邈鰲頭程懸驥尾苟非先鳴汲引哲  
匠發揮縱或自強行將安適伏以員外斷籛積  
學計斗負才龜鏡詞林梯航陸海是故門駢鄭

市俗墊郭巾爭俟栽培互希丹飾而滔牛涔淺  
 狹燕戲微茫豈合攀投徒為激切員外燕中市  
 駿稷下館人皆使有歸不言無敢猥流厚旨曲  
 降隆私滔是敢引事推言徵文借喻且傑如韓  
 信未歸漢祖以誰知美若西施不入吳宮而孰  
 驗所以蟄劔而凌虛吐耀焦桐而駭耳飛聲然  
 後感動良知遭逢至鑿事雖小異理或大同伏  
 惟稍降尊嚴俯垂惻隱如滔昧為貢士淺作文  
 夫方今不右武功大先文教矯辭人於鸞谷鑰

宗伯於龍門其有負馬之文華韞顏之德行或  
 栖栖以至或嶽嶽而來未嘗不坐馳日下之名  
 立貯殼中之望是何謝茲振發而處彼幽沉頻  
 年厠角逐之場眾口蔑殊尤之譽齊國篲秃荆  
 山眼枯漸覺途窮虛云舌在豈可堅期御李確  
 慕依劉志空切於投林醜難逃於側管伏惟員  
 外魏車委照軒匣揚光儻憐其刻意探幽焦心  
 體物雖則異於披沙之說然略幾於架屋之譚  
 許列書筠令叅撰杖今者或因薦士敢乞編名

所希從數仞牆伴二三子增輝瑣質擅價主人  
皆由一顧之仁翹矜百金之諾含毫汗下伏紙  
魂驚非切覬覦所憂誅戮叨越干犯下情無任  
戰懼屏營之至

侯博士

圭

滔口諷雄詞心祈藻鑿在他處則早逾一紀來  
上國則已建二年常測管以推誠每持蠶而注  
念蓋期御李非敢希顏所以竊贅荒蕪薦塵墻  
仞聳蟻封於丘岳疏蛙渚於陂湖敢望吹噓佇

聆誚責昨日進士林郁忽傳尊旨遽話殊私伏  
惟博士曲降恩知俯迴獎錄不置蓋甌之地爰  
興讀蜺之言事邁常倫榮過始望傾身拜命跼  
影瞻風若聽咸韶如吞甘醴敢便認爲知己蓋  
將決定胷襟實以當今文教風行詞人輻輳莫  
不俱陳素業各務所歸而博士負擲地鴻名標  
揆天逸勢吐揚雄之五藏陋班固之兩京故其  
接踵望塵駢肩執刺爭爲秤挂互作鏡窺或聞  
由也升堂賜之入室是則千門改觀萬戶飛聲

若瑤壁之飾來類金絲而振出所謂功侔造化  
言繫慘舒作詞林培植之家爲陸海梯航之主  
必當不私其一顧誤彼衆聞以滔數載辛勤一  
生疑惑唯傾丹懷翹矚重言冀將卜以妍嗤斷  
其可否今則出於門館發自齒牙事旣殊常道  
方自信枿同寐覺夔若神通呈材之獲般窺鬻  
馬之蒙樂顧已逢哲匠肯愧他人蜀壁端居管  
牀兀坐旣佩茲聲效益勵彼顛愚苟無疑於鏤  
米則求工於刻楮忭躍兢悚罔知所裁下情無

任感恩激切之至

蔣先輩二首

滔自違門仞尋達家山拜慈親而聚族生光述  
弘造而一時泣下蓋以生平事業出自宗師豈  
惟特異之恩知仍契非常之事分昨者賫持惡  
賦刺謁清塵本期劉子俊家待以蓋甌之地陸  
士衡處置於撫掌之間豈期以寸獲長鬻鴛竊  
價伏蒙校書先輩驚人賞錄越等褒稱篇篇而  
喻作金聲一一而讀爲蜩字迥施異禮疊錫嘉

言及門則倒屣於仲宣侍座則授經於左氏周  
旋許與覲縷指揮畢今如蘿附松更使以膠投  
漆俾從秋賦首出門牆顯示輩流別加援引且  
古人之慕元禮纔獲御車學者之師仲舒未曾  
識面以斯修省莫有比倫永言遭逢得謂卓絕  
矧國朝之設科待士較文取人往歲主司則斷  
於獨鑒近時公道則採自衆稱絲是重望朝賢  
有名先達得以主張斯道梯級將來至若有負  
兼才且非所業或文章而稱詞賦或律韻而譚

古風猶自彼唱此傳影隨響答其况專功與善  
本面說人又若校書先輩鳳藻凜天鴻名傑俗  
今時賈馬昔日班張猶在場中多士便瞻於咳  
唾旣行天上一言何啻於興衰當以調啞使鳴  
吹寒令暖伏自歸寧膝下駐跡江干白日思惟  
中宵起坐旣名爲得路當別議感恩况緣家邈  
東閩路遙北闕一迴逐計數載違親頃者累繕  
蕪詞歷投碩匠或蒙開口少值動心以此鼓勇  
無門自疑不暇今則從大藩之賓榻得當代之

主人豁如釋氏之破迷醒若神醫之愈疾一家  
相賀舉目增輝進取有茲肺肝可察伏以上京  
迢遞難於獻歲支離須俟新春方議假道進發  
芸馨酷烈蓮幄清虛昨陪侍於遊從今綿隔於  
烟水別無言語併陳於殿浩函中空有夢魂常  
遠於燕昭臺下

又

滔伏念希逸知名於靈運不作門人左思擅價  
於士安非爲弟子雖則清風凜若懿範昭然得

將爲千古高譚未免是一時闕事讎思到此因  
敢形言滔賚持淺蕪塵觸門仞遽竊披沙之諭  
爰蒙折簡之知事實驚時榮將越望而又謂前  
賢之未至垂厚意以特殊將令別議依投用堅  
恩德資今日顧憐之肯作它時汲引之由苟開  
如此之懷豈是偶然之事赫赫昭代鏘鏘衆人  
榮持哲匠之發揮薦向良時而角逐則何患龍  
宮之杳杳何憂蟾月之高高足以雪曩歲之湮  
沉恢張襴刺壯平生之意氣棄擲終繻如此若

黃先生集 卷之十  
不激切擊丘淒涼誓劒豈謂脩文學古何名勵  
節砥躬伏自虔侍清塵仰叨殊遇未嘗一夕不  
將心禱於神明縱極千言難以筆書於丹赤攀  
謝感激罔知所容

楊狀頭

贊圖

滔驟持末學遽竊殊知伏自豫章數旬滄浦一  
路肩旅舍而夜唯假寐逐征帆而日但沾衣蓋  
以虔載遭逢仰思情旨先輩主中興之文學作  
來者之著龜伏蒙採酒所業異於等倫憫酒所

舉困於曩昔大張金口精發瑤函且午火燒空  
一陰司月面泉石或病乎炎毒處城池而奈彼  
鬱蒸况土風則竹屋玲瓏煙水則葉舟蕩漾纔  
曉而烏光赫透欲風而魚沫臙飄雖付於醴酒  
醅醕或亡杯混又屬其羽書重疊時觸高明誠  
知不乏餘波爭奈罕聞暇日豈可更抽秘思別  
運真蹤每摘一幅之霞賤咸滴千痕之雨汗雖  
才過倚馬曾無起草之詞而字悉如蠅幾苦生  
胝之筆未知單賤何補生成賁行而便是金丹

舉步而則昇雲漢矧復公言私論要訣神方一  
一指蹤頭頭傳授將克周於頂踵俾無失於毫  
釐以此推恩而前古所稀以此行道而方今誰  
比士林名路一朝有知己如斯白日青天萬世  
唯子孫爲誓下情無任感恩泣淚悚謝之至

代鄭郎中上興道鄭相

伏念石甫受知於途中駿茂申言於堂下旣情  
非曩舊復地隔尊卑尚能感動至公遭逢殊禮  
而滔神資所向天授其時獲曠代之因依得千

年之幸會豈可永緘丹赤上負陶鈞伏惟相公  
特降恩慈俯垂惻隱昔年羽化曾陪鷺谷之春  
今日雲飛俄隔鳳池之路信鶴雞之果異諒牛  
驥之終懸徒增倚玉之榮幾積續貂之愧况相  
公負英才而作礪持碩望以登庸始者四海傾  
心一人側席朝聞坐幄暮見飛霖扇澆薄爲淳  
風激讒邪歸直道均施鑪冶高揭權衡使鈇汞  
之不叅令錙銖之各等故得方圓任器高下隨  
宜黜陟無偏賢愚有序滔早甘退跡忽喜逢時

遽從學省之前銜爰踐蘭宮之峻級已為塵忝  
誠合揣循竊思頃年九陌秋天都堂雪夜常容  
披霧每許叅瓊逮夫片玉昇科兼金列榜雖登  
龍羣彥同戴丘山而附鳳一心偏投膠漆既以  
宗盟屬意仍從知舊留情重疊依投綢繆獎錄  
遂使慶鍾末路福逮今辰既預門墻仍從埏埴  
宛得御車之便無煩擁篲之勞但以滔弱羽難  
高么絃易斷始自筮仕及于登朝未嘗暫識清  
途略遊華貫亦人地之所拘限何窮通之切咨

嗟洎夫郢俗塞帷穰城建隼連叨竹使尤愧棠  
陰雖阜蓋紅旌別過素望而霜臺粉署終繫丹  
心今則榮竊握蘭幸當襍被馮唐歷踐誠知戴  
白之年貢禹棲遲且有彈冠之地

代鄭郎中上靜恭盧相

伏以天覆地載縱鬼神之與皆臻陰伏陽升雖  
鱗介之微必動道既如此人焉忽諸伏惟相公  
持重器以為霖負英才而坐幄傳丹青於直道  
扇鑪冶於至公致一物之無遺使萬方之有賴

黃先生集 卷之七  
二十二  
滔顧惟瑣陋獲忝鈞鎔既契之於無私固施之於不報豈宜遽賚感激竊拜門墻但以事出非常恩從特異若不披於丹赤則終有負於神明伏惟俯降尊嚴暫垂聽察滔才非敏幹性本顛愚自從振跡春闈投身宦路徒綿歲月莫致飛馳却則窮途前皆散地是亦用之則未爲國士捨之則益類腐儒因自揣循每加退縮然而竊念古人不遠賢路非遙皇朝自科擢英髦爵昇品秩其或來從草澤生匪簪裾亦常列入清途

參爲盛觀所以益持孤子尤切兢修節勵松筠心傾葵藿常注目於煙霄之上每馳覓於省闈之中逮夫玄鬢凋空壯心折盡曾無影響空極瞻攀豈期相公纔揭權衡便垂採掇俾遭逢於聖日令允愜於平生所謂材並得宜物無遺性信造化之功不及豈推遷之令能侔義貫古今恩逾卵翼况相公峻于埏埴切彼弼諧當今士兮如林朝稱不乏足得廓其公選擇以良才而滔已懷耕釣之心近閉雲林之跡設令漏網未

曰遺賢是何特達開懷周旋軫念青山在目方  
將魚鳥以同歸鴻渥連天忽歷煙霞而曲被從  
杏壇之舊籍踐蘭署之清資豈是常情諒非小  
事伏自榮叨僕被幸竊含香未嘗一夕暫安片  
時不感常若千鈞之在頂每將孤劔以誓誠但  
以有地受恩無門瀝懇只眄高車而激切空持  
敝帚以屏營淚則沈瀾心唯恐悚瞻風拜賜對  
景懷仁涸彼言泉固申陳而未盡託於筆札豈  
寫載以能周攀謝兢惶罔知所措

代鄭郎中上令狐相

某今月四日轉授刑部郎中伏蒙相公仁恩特  
賜寵誨事從非次言異常倫感激兢惶進退失  
措伏以某材非可採藝不足稱出自門墻樹爲  
梯級纔榮地部復陟秋曹持鷓鴣決起之姿到  
鸞鷲曾棲之地相公憐其拙滯忽此騫翔疊降  
恩輝荐畱手筆指今忝幸叙昔經過始者九遷  
曾假虞邦之道向來一字爰垂魯史之褒義極  
生成彩逾丹雘拜窺垂露跪捧隆私汗浹背流

淚盈皆下未知順風弱力撮土微形獲黍一日  
之高蹤何報千鈞之重意唯謹緘於篋笥常誇  
向於搢紳爲宦路之遭逢作仕流之卓異攀謝  
懇切不任下情

代陳蠲謝崔侍郎

某啓戶部鄭郎中伏話鄭隱先輩專傳侍郎尊  
旨伏蒙於新除永樂侍郎處特賜薦論跪對吉  
辭拜聆嘉耗感激兢悚罔知所容某詞學踈蕪  
進取乖拙一叨貢士累黜名場足間之別處縱

橫額上之黥痕重疊今春伏遇侍郎精求俊彥  
歷選滯遺某又名礙龍頭跡乖豹變都由薄命  
齷負至公以此怔忡莫寧惶惑無已在良時而  
自失於異日以何歸謂一生而便可甘心歎二  
紀而徒勞苦節豈料侍郎堅垂記錄確賜憫傷  
令後人而副取前心指陋質而說爲遺恨將使  
蔡經之骨終繫仙家士燮之竟却還人世蓋施  
陰德豈止陽功喜極翻驚感深唯泣明年春色  
致身雖出於他門今日恩光碎首須歸於舊地

西川高相

相公嶽降宏才神資偉望象外而藹然妙旨人間而凜若清風當以四三傑於漢庭九八元於堯日聖上以南澄為水克仗英威西鎮龜城湏資妙略所以未歸台輔且據重難巍峩兩地之勲冠絕一時之盛允在中外孰不具瞻

蔣先輩

三吳煙水百越山川兵戈杳隔於音塵門館久違於趨覲空自明祈日月暗祝神祇相如徵出

於上林賈誼召來於宣室不然者隱於商嶺棲向傳巖克俟搜羅直膺夢寐焚香稽首以日繫時酒一滯江鄉六更寒燠都由惡命早失良時迢遞一名進取則大朝有難零丁數口退休則故國無家歸蜀還吳言發涕下

沈侍御

侍御麟鳳瑞姿蓬瀛絕境叔度與陂湖比量仲尼將日月齊明自飛翥九霄梯航陸海鄭門若市季諾如金為學園之芝蘭作詞林之杞梓今

黃先生集 卷之十  
則提携陳檄登陟燕臺冠張豸角以巍峩幄拆  
蓮花而照耀假途如此殊拜寧遙凡在人情孰  
不傾矚

段先輩 十一首

判官先輩萬頃襟神四科文行比鸞鶴而既冲  
霄漢喻龜龍而須瑞皇王今者賓幕清風士林  
重價雖欲留歡於五辟其如積望於九遷伏計  
卽有新榮別膺殊命滔蒙知旣異感德常深辭  
違遽變於暄寒禱祝敢忘於朝夕

又

昨於道路累附狀伏計迺遷上達滔行役近已  
到潮州伏以一路經過二年飄泊言則涕下靜  
而魂銷固非繫情於杯酒笙歌留戀於雲山煙  
水拋擲進趨之道遲廻温清之期伏計夙鑒如  
愚必當知不得已又安可遠含丹赤莫寓聽聞  
且聖代近來時風愈正取舍先資於德行較量  
次及於文章無論於草澤山林不計於簪裾絀  
冕少有三舉五舉多聞十年九年而滔自厠跡

其中且迷津不暇况乎來則無終軍意氣動則  
有楊朱路岐將上一歸僅闕兩試人事如此光  
陰幾何先輩特賜恩知姝爲誘誨時或軫念固  
應動心然亦否極則通彩來自聖他日而若無  
好命今辰而焉有良知唯當依倚栽培諮詢可  
否陳琳牋檄寧容久借於外藩夫子門墻虔俟  
再趨於上國

賀正

伏以司雞殷朔建虎堯辰仙人則飲栢延齡詞

客則浮椒獻頌伏惟相公膺茲令節納彼嘉祥  
邵伯甘棠葢地之芳陰更闊亞夫細柳連天之  
瑞色長新與青陽而同發生揭鴻鈞而普播物  
永貞國柄堅律師壇

又

伏以青陽變律乃二儀革故之辰獻歲開正是  
四氣惟新之日伏惟僕射與春符契觸物貞亨  
迎瑞節於鳳銜榮兼四輔建碧幢於甌越永保  
千年凡於動植之間長受暄和之賜

趙起居

滔今日二十日輒以所業賦一軸陳獻清嚴持  
腐草之造扶桑鞭款段之觸騏驥所宜唾面敢  
俟回眸伏以起居爲八韻之咸詔作九流之溟  
渤凡言進取須自品題而滔二紀飄零三朝困  
辱若不仰投門館度佇發揚則永携疑玉以沈  
瀾長伴啞鍾而泯默攀託祈禱倍萬等倫

崔右丞

二首

滔獻賦命奇食貧計盡難安桂玉須逐萍蓬伏

念灞漣行塵周秦去路平言南北猶悄神蒐况  
今攀託門墻依憑獎顧以坑谷蒼黃之態戴丘  
山岌業之恩得不欲別還留將行復却丹誠聚  
血雙淚流珠矧當杏苑煙晴柳溝風暖陌上而  
羣英得意塵中而衰髮傷離設令勇若荆軻固  
亦慟如阮籍伏以右丞弘施陰德濬哲仁心儻  
或萸枯肉骨之未忘則膠柱刻舟而敢怠寧言  
今日唯惕將來遲回數仞之墻邊移時忍去愴  
恨九重之城外舉策何之感戀屏營固知攸處

黃先生集卷之七  
一鶚累榜以未亨之數愧積遷鶯莫不惕息肺  
肝兢惶顏面既茲負累合在棄嫌而又薦以羈  
遊仰干牋翰雖弘容之不改且循省以何安永  
炭交懷芒刺在背今則已莊行計卽擬出京不  
唯推戴岳之誠指於皎日抑且切戀軒之志泣  
向清風攀感屏營罔知指喻

韋舍人

滔近者輒持齋戒虔寓牋毫瀝南山待旦之誠

告北陸移暄之律理雖可憫罪或難逃伏惟舍  
人義路無疆詞源絕岸設鑄顏之鑪冶恢薦禰  
之牋函今則主文侵入院之期哲匠走致書之  
日儻蒙枉於公道申以私思念滔夙陷義園薦  
臨文陣化鯤海闊乘風水以未知爲鯉年深逼  
雲雷而愈懼特因薦士敢乞編名則獲從金籙  
以上聞焉有玉皇之不齒立辭坑谷繫在生成  
攀託禱祠涕淚沾迸

工部陸侍郎

滔伏念聚蚊響於出震之音其雖懸越奔羽族  
於鳴岐之德乃不參差事既同途理宜瀝懇伏  
惟侍郎韞縑細之奧學負詞賦之重名相如則  
逸格揆天孫綽則英聲擲地播於金石流入典  
謨竊以滔架屋懷慙披沙莫喻固自循揣豈宜  
贊投但以水合朝宗雲湏觸石繇是年賚鄙拙  
首扣門墻實爲舉場之中貢士所業律詩古調  
詞賦歌篇前則貞元元和之風耳聞其事近則  
咸通乾符之事目覩其風求知已則咸禱於兼

功斷否臧則湏歸於本面然後人方必信道逮  
無疑則滔一生辛勤數載攀祝必若題品不出  
於侍郎金口薦揚不出於侍郎瑤函縱能別契  
亨通固宜終慙暗昧矧以迷津未已泣荆方深  
比者先輩陳樵早同硯席曾將姓字虔爲啟聞  
伏知侍郎猥賜獎容異於倫等其後薦自同志  
嘗聆玉音而侍郎文學著龜朝廷領袖滔不敢  
以後來舉態近日時情僭瀆尊嚴躬陳一二今  
則又摧髻鬢又近風波溝隍無必出之門肝鬲

在須傾之地免叔向則他日莫議活士燮則神術所能願推恩於留馬埋蛇庶受賜於萸枯翼卵下情無任攀託依投激切惕懼之至

翰林薛舍人

滔伏以十一日纔除主文旋瀝精懇罪責則可言於躁切憫傷則宜恕於單危非不三省九思沉吟牋管而以途窮日暮恐懼風波亦猶抱沉痾者悉將虔告於神鑿懷至痛者無不上呼於穹碧伏以學士舍人軒銅照膽蜀秤懸心仰惟

燭臨當極幽奧且夫禮司取士寒進昇名若無哲匠以斲成未有良時而自致不然者則安得權懸至鑒代有遺人伏惟學士舍人標表士林梯航陸海允言進取湏自門墻今以文柄有歸至公弘播則精力固同於造化嘉言乃作於蒼龜而滔折角有年交鋒無託羽毛零落鬢鬣摧殘若不自學士舍人推恩極山岳之隆攘臂到溝墮之底則還慙抱甕難出戴盆兼近者面獲起居親承念錄哀滔昔年五隨計吏則雙足以

全空今復三歷貢闈救陸沉而未暇許垂敏手  
拯上重霄謹以誓向鬼神刻於肌骨中興教化  
一身免沒於風塵下國兒孫百世敢忘於廝隸  
下情無任攀投懇悃之至

裴侍郎

滔伏念薦孟明則子桑所能免叔向匪祈奚莫  
議推言及是瀝懇爲宜上瀆清隆敢希容聽伏  
惟侍郎中丞頃持文柄大闡至公垂爲聖代之  
準繩懸作貢闈之日月滔爲後無私之兩榜遂

乖必字於十年伏蒙侍郎中丞曲賜憫傷直加  
賞錄連歲薦論瑣質傾極重言而以弱植難培  
么絃易斷且驚負累空費生成旣而不罪龍鍾  
愈隆恩遇昨者面容跪履親俾窺天仍加琢玉  
之品題更啟如金之然諾便於此日上翥重霄  
今則已除主文只祈陰德延頸於溝隍之底瞻  
恩於丘岳之隆雖龜龍不瑞於匹夫而犬馬合  
由於本主沾巾墮睫瀝膽披肝不在他門誓於  
死節下情無任攀託依投懇悃之至

黃外集卷之七  
楊侍郎

伏以羲文不兆之文何人復演魯史不褒之事  
曠古誰稱厥理非遙斯言可喻伏以侍郎榮司  
文柄弘闡至公歷選滯遺精求文行泉下則大  
臣有感揭起銷沉場中則寒族無差酌平先後  
所以如滔者曾干衡鏡經定否臧若不蒙指向  
後人說爲遺恨則宰輔之爲薦舉帝王之作知  
音而主且不言人誰肯信繇是湏出侍郎金口  
湏自侍郎瑤函今則論啟無私恩加瑣質錫生

成於此日迥分付於將來早從握內以擠排便  
是眼前之科第然後念以漸臨風水莫如蓬島  
之音塵俾拜雲天親吐蘭言而誨諭留心及是  
自古所希莫不拳跼循涯闌干抹泣質向神鬼  
誓於子孫鸞谷乘春雖託他門而振羽糜軀異  
日湏歸舊地以論恩瀝肝膽以無窮寓牋毫而  
莫載下情無任感恩懇悃之至

薛舍人

今月二十八日張道古參軍仰傳仁恩伏承舍

人學士不以滔幽沉榮賜論薦初疑夢寐旋認  
生成不知所容兢惶戰悸伏以舍人學士半千  
膚數全碩負才嘉名冠絕於九流逸步翱翔於  
四戶頃者重於知己避以文闡隆行望於聖賢  
蓄基負於台鼎竊惟薦士豈易其人而滔蹤跡  
蹉跎藝能淺薄敢期弘造遽及茲辰金口開時  
講貫則處其異等瑤函發處推揚則寘彼極言  
事出殊常榮非所望感深唯泣喜過齟驚不知  
微生何酬厚遇中興教化餘年獲出於溝隍下

國兒孫累世敢忘於廝隸


趙員外

伏以曦轡流輝已侵窮臘禹門飛浪卽到登時  
莫不顯多士之精誠佇有司之新命竊惟萌朕  
已見昇沉若滔也折角有年爭鋒無主空秉龍  
鍾之態仰希傷憫之求此亦有類守株其疎若  
網伏惟員外學士猥隆恩遇克異等倫近者面  
獲起居親叨然諾自歸旅舍徹坐寒宵歷將往  
事以思惟洞見今辰之通塞且夫春官取士寒

進昇名若無哲匠之斷成未有良時而自致不  
 然者則安得權懸至鑒代有遺人伏以滔別無  
 知音只投門館儻或員外學士止推言於公薦  
 不攘臂於私恩則滔也望絕飛馳甘為簸棄至  
 若白雲巖谷青草汀洲敢辭依舊秉耕踵前沉  
 釣然以來時耆舊別後交親皆謂中興雪先朝  
 之困辱寧期上國看後輩之飛鳴必疑有過於  
 措持無聞於卿士既顏面而斯乏湏蠻貊而云  
 行是以瀝膽披肝碎身殞首永將死節不誓他

門伏惟員外學士義路連天仁心匪石敢希援  
 拯畢賜生成珠岸盤根始作不枯之草金丹入  
 口能還已逝之魂祈禱依投啟喻罔盡下情無  
 任攀託懇悃之至

黃先生集卷之七終



唐黃先生文集卷之八

唐監察御史闡黃滔著

序

穎川陳先生集序

唐設進士科垂三百年有司之取士也喻之明鏡喻之平衡未嘗不以至公爲之主而得喪之際或失於明鏡或差於平衡何哉俾其負不羈之才蘊出人之行歿身名路抱恨泉臺者多矣嗚呼豈天之竟否其至公也抑人之自坎其命

邪穎川陳先生實斯人之謂歟先生諱黯字希  
孺父諱贄通經及第娶江夏黃夫人賢而生先  
生無昆仲姊妹十歲能詩十三袖詩一通謁清  
源牧其首篇詠河陽花時面豆新愈澹之牧戲  
之曰藻才而花貌胡不詠歌先生應聲曰玳瑁  
應難比斑犀定不加天嫌未端正滿面與裝花  
繇是聲名大振於州里十七為詞賦作蘇武謁  
漢武帝陵廟賦便為作者推伏二十為文先生  
松姿柳態山屹陂注語默有程進退可法早孤

事太夫人彌孝熙熙愉愉承顏侍膳雖隆雲路  
之望終確綵衣之戀既而及其子蔚冠太夫人  
勉之曰付蔚於潘岳之筵俟爾於郗詵之桂方  
起於鄉薦求試貢闈已過不惑之年矣乃會昌  
乙丑逮咸通乙酉其間以寧家兼在疚之斷絕  
往來吳楚之江山辛勤秦雍之槐蟬嘆嗟知己  
之許與與同郡王肱蕭樞同邑林顥漳浦赫連  
韜福州陳蕒陳發詹雄同時而名價相上下嗚  
呼斯八賢皆以不羈之才出人之行懇懇乎進

趨恂恂乎鄉黨而無所成豈天之竟否其至公  
耶抑人之自坎其命耶俾有司失其明鏡差其  
平衡之如是結冤氣於名路之中銜永恨於泉  
臺之下豈不甚歟先生之文詞不尚竒切理也  
意不偶立重師古也其詩篇詞賦牋檄皆精而  
切於官試尤工滔即先生之內姪也非而趨隅  
頃隨註之歲先生下世後二十五年而忝登甲  
第東歸之求遺藁其季子遠泣曰兵火也少得  
其文三十一首賦若干首他處得詩若干首敬

俟增而後述天復元年滔叨閩相之辟旋使錢  
塘與羅郎中隱遇隱曰咸通初與先生定交於  
蒲津秋賦之場賦則五老化爲流星詩則漢武  
橫汾先生之作也爲試官嚴郎中都之吟諷秋  
場五十人之降仰今遺藁可叢願序之旣還不  
及求增謹以所得之文賦詩牋檄分爲五卷抹  
淚搦管爲之前序將寓正郎爲之後序正郎負  
宇內之雄名用釋泉臺之永恨時天復二年秋  
七月也

讚

龍伯國人讚

國人之釣也一釣聯六鼇而存者一鼇而已其猶背蓬萊方丈嬉遊神仙偉夫設六者不餌其何如哉洪濤七其洲渚塵世幾其躁妄則以古以今之君皆秦漢也推是言之斯人也不謂無功於有國故追以讚之曰

磻溪之釣兮釣更殷周龍伯之釣兮釣滅嬴劉腹濟背虛兮一聯月鉤巨骨駢器兮鴻臙疊羞

豈惟一時兮表竒東海抑乃萬祀兮垂祉中洲

一品寫真讚

夫山嶽之隆莫隆於嵩華江海之大莫大於溟渤故天之生聖賢於百千年也乃稟其竒秀以爲之氣色包其浩蕩以爲之胸襟落落汪汪如龍如鳳然後總兵符於握內懸相印於腰間煦育生靈扶持邦國大矣哉將如是則命良工持筆之精賚墨之妙寫于儀貌移於繒素不可以不叙不述小從事滔職忝文詞齋戒而獻讚曰

嵩華干天氣貌斯然溟渤紀地胸襟靡異謂如  
龍也至靈謂如鳳也嘉瑞列素在壁良工善移  
一時丹雘兩面風姿秋月寫彥回之質岸寶山  
分叔則之表儀松森峭壁日映咸池聖君急麟  
閣之繒明朝當詔旨之飛索而觀之

雜文

夷齊輔周

列位於朝無言於君曰輔歟抗跡於野有言於  
君非輔歟麟鳳龜龍王者之嘉瑞朝其庭乎暮

其沼乎武王聖人也周公聖人也召公賢人也  
天下三分以其二分以火殷辛且致夷齊之扣  
馬設使盡天下之三分姑至殷辛之自火然若  
太伯之君吳則百穀合穎於舜耕九鼎同波乎  
禹珪仲尼之又盡善也寧獨韶乎旣而異諸則  
周之道首陽之餓乃諫死作夷齊輔周

吳楚二醫

吳人之疾不救其屬善醫憫其家竭其術以治  
之楚人之疾救其屬善醫欲其家逆其術以治

之君子痛二醫之行若乎治亂比于知殷之不  
救而救之仍藥之以九竅李斯目秦之救而不  
救之卒鳩之以二世嗚呼殷之亡也疾之甚矣  
秦之亡也醫之罪也後之有國有家者得不慎  
乎醫

禱說

天有日月民無一旦之薦地有江山歲有四時  
之禱得非彼之至明烏兔無得而私焉此之至  
大神龍其或權焉是則尊有天下無不日月其

德而億兆之心咸急江山之禱

綿上碑

至忠之為人臣君不之德怨甚為忠乎至孝之  
為人子親不之德怨甚為孝乎苟非忠與孝則  
介推藝若枯株名叅悖德又焉可祠儀忌赫于  
千春哉且重耳得國之初賞功之際鍾鼎鱗次  
獨推漏澤覺夢覺之覺然而索懇至焚林而推以一  
時之失為歿身之怨可乎設終身之失特何加  
之別使志忠而疑至孝而惡去聲又何如哉則周

公宜怨於成王大舜宜怨於瞽叟以功急賞則  
漁父宜腰於伍劔魯連宜罄於齊粟矧推之且  
養不志祿其甘乎始事君後急賞豈賣忠而賈  
爵乎愚謂介推之意不然以重耳之不德愈知  
其母之賢既得其與爾俱隱之言從其德則其  
言晦逃其跡則其言彰其言彰則其母名斯大  
孝之志也仲尼云立身揚名以顯父母立己之  
身揚己之名猶冀泝流父母豈母賢之未名而  
已不名之乎祿親者衆名親者鮮使獲其言若

祿其甘是瀆其賢推是以死其君怨取賢其母  
名斯介推之意也

噫二篇

或謂聾者曰師曠也瞽者曰啜婁也無不悖其  
辭之戲或謂魯儒曰顏閔也蜀儒曰楊馬也無  
不喜其辭之矣是何彼以視聽之亡而苟能自  
鑒此以耳目之貌而反不自知噫

芝蘭草也松桂木也喻於君子而榮之桀紂君  
也李斯大臣也盜跖華胄也踰於小人而耻之

則知蛇克銜珠而奚蛇龍苟醢身而匪龍噫

文栢

仲尼之道顏閔得之為四科後人得之為顏閔  
鳥獸得之為麟鳳草木得之為文彩故廟之堂  
有文栢焉頃為官于國子者刃一枝器有司得  
而竄諸噫聖人之道未嘗不缺也若天之西北  
地之東南日之吳月之虧也故聖人窮於陳蔡  
宋衛顏天麟傷皆有以也設使不有陳蔡宋衛  
之事則何以象天地日月之盈虛乎顏不天則

何以感子之慟麟不傷則何以明子之道時君

缺之也斯栢也不為其官者刃而竄諸則何以

繩後之權者謂必權者是取之器也故天以傾西北而拱

列宿地以缺東南而朝百谷日以吳而成早暮

月以虧而見盈縮予以陳蔡宋衛而示損顏以

慟而益彰麟以憂而示時君斯栢也以刃而後

永則知聖人之道不缺則不全于不朽也

公孫甲松

公孫甲善畫松漢武帝時公卿牙求之或旬或

月或季得之如至寶武帝暇顧東方朔曰卿得  
甲之松乎對曰臣未嘗得之色沮帝怪朔徐而  
進曰臣見公孫甲之善畫松舉國舉朝之人奇  
之狂然其所棲鶴其形吟風清韻或森踈澗底  
或翳鬱庭際而過者罕不或之目臣痛其假能  
奪真故不求之且丹青其筆物至於是枝葉其  
口人胡以勝臣敢以陳之昔妲己之假奪比干  
之真靳尚之假奪屈原之真宰嚭之假奪伍員  
之真是三者皆以至真至誠卒不能制其假矧

不逮者乎武帝悄然改容翌日雪司馬史於旣  
刑臺戾太子於不及

### 唐城客夢

客有宿唐城之鄙夢一神曰吾幸以神神之道  
獲司茲土之休戚饗其二仲之馨今值子之有  
道得以休焉旦北而徂山之曲乃見蒼翠一林  
其中則楮煙墨宇椒瀝坎地羣焉昨充飛而不  
舉入謁廟貌乃夢中之見者也或曰不羞不繆  
不緡胡跡句斯廟也能倒錯倚伏盼蠻生死雖

有道與不善一焉客曰果如是乎思其夢頗憤其神之言乃藝詞以讓其略曰風雲其力溪壑其心福善禍淫賈茲反覆其神神之道耶前夕荐夢其神覺容投拜曰微子吾乃不日爲上帝譴矣向者悉吾左右蔽爲不之察也幸子之教咸得族而併之矣客逢其里人以廟詢曰近者淫祀而罔應故不祀丘禱而無咎且二仲之馨存焉

至比

至比言妖孽之至於人無不誠而懼士言妖孽之至於國無不逆而怒何哉曰至能前知妖孽之至不能却明妖孽之由士能前知妖孽之至乃能却明妖孽之由故異也至言可禳則設淫祀指虛應故誠於可爲懼於所聞士言可禳則殺姐已活比干故逆於聞怒於不可爲嗚呼設直士世用之如邪至鯁辭國納之如簧言則有國有家者何逮乎患

唐黃先生文集卷之八終

唐黃先生文集附錄

唐昭宗實錄

乾寧二年二月乙未勅高宗夢傅說周公遇子  
牙列位則三公弼諧則四輔朕纂承鴻緒克紹  
寶圖思致洽平未臻至化今大朝方興文物須  
擇賢良冀於僉選之間以觀廊廟之器今年新  
及第進士張貽憲等二十五人並指揮取今月  
九日於武德殿祗候委中書門下准此處分仍  
付所司丙申試新及第進士張貽憲等於武德

殿東廊內一人盧賡稱疾不至宣令昇入又云  
華陰省親其父渥進狀乞落下分二十五鋪分  
不許往來內出四題曲直不相入賦取曲直二  
字爲韻良弓獻問賦以太宗所問工人木心不  
正脉理皆邪爲理道取五聲字輪次各雙用爲  
韻詢于芻蕘詩回文正以芻字倒以蕘字爲韻  
品物咸熙詩七言八韻成令至九日午後一刻  
進納丁酉宣翰林學士承旨戶部侍郎知制誥  
陸辰祕書監馮渥於雲韶殿考所試詩賦各賜

衣一襲氊被等已亥勅朕自君臨寰海八載于  
茲夢寐英賢物色巖野思名實相符之士藝文  
具美之人用立于朝庶禪於理且令每歲鄉里  
貢士考覈求才必在學貫典墳詞窮教化然後  
升於賢良之籍登諸俊造之科如聞近年已來  
茲道寢壞鸚多披於隼翼羊或服於虎皮未聞  
一卷之師已在遷喬之列永言其弊得不以懲  
昨者崔凝所考定進士張貽憲等二十五人觀  
其所進文書雖合程度必慮或容請託莫致精

研朕是以召至前軒觀其實藝爰於經史自擇  
篇題今則比南郭之等音果分一一慕西漢之  
辭彩無媿彬彬旣鑒妍媸須有升黜其趙觀文  
程晏崔賞崔仁寶等四人才藻優贍義理昭宣  
深窮體物之能曲盡緣情之妙所試詩賦辭藝  
精通皆合本意其盧瞻韋說封渭韋希震張蟻  
黃滔盧鼎王貞白沈崧陳曉李龜禎等十一人  
所試詩賦義理精通用振儒風且躡異級其趙  
觀文等四人并盧瞻等十一人並與及第其張

貽憲孫溥李光序李樞李途等五人所試詩賦  
不副題目兼句稍次且令落下許後再舉其崔  
礪蘓楷杜承昭鄭稼等四人詩賦最下不及格  
式蕪類頗甚會無學業敢竊科名浼我至公難  
從濫進宜令所司落下不令再舉其崔凝爵秩  
已崇委寄殊重司吾取士之柄且乖慎選之圖  
辜朕明恩自貽咎委中書門下行勅處分奏  
來其進士張貽憲等二十四人名准此處分賜  
陸扆馮渥銀器分物其落下舉人並賜絹三匹

中書門下覆奏伏以文學設科風化是繫得其人則儒雅道長非其才則趨競者多實在研精仍資澄汰昨者宣召貢士明試殿庭題目盡取於典墳賦詠用觀其工拙果周睿鑒盡叶至公升黜而懲勸並行取捨而憲章斯在其趙觀文等二十四人望准宣處分崔疑商量別狀奏聞丁未勅國家文學之科以革隋弊歲登俊造委之春官蓋欲華實相符爲第一用近寢訛謬虛聲相高朕所以思得真正之儒以掌其事而聞

刑部尚書知貢舉崔疑百行有常中立無黨學窺典奧文瞻菁英洎遍踐清華多歷年數累更顯重積爲休聲遂輟其憲綱任之文柄宜求精當稍異乎常朕昨者以聽政之餘偶思觀閱臨軒比試冀盡其才及覽成文頗多蕪類豈宜假我公器成彼私榮旣觀一一之吹盡乏彬彬之美且乖朕志宜示朝章尚遵舍垢之恩俾就專城之任勉加自省勿謂無恩可貶合州刺史

廣撫

言所載一同

莆陽志

黃滔字文江乾寧二年乙卯趙觀文榜進士光  
化中除四門博士尋遷監察御史裏行克威武  
軍節度推官王審知據有全閩而終其身為節  
將者滔規正有力焉中州若李絢韓偓王滌崔  
道融王標夏侯淑王拯楊承休楊贊圖王侗歸  
傳懿避地于閩悉主於滔時閩中所為碑碣皆  
其文也今浮圖荒隴舊刻猶存

五代史補



黃滔在閩中為威武軍推官王審知饋之魚黃  
滔方與徐寅對談遂請寅代為謝牋寅援筆而  
成其略曰銜諸斷索才從羊續懸來列在瑀盤  
便到馮諼食處時人大稱之

丹鉛總錄

明 楊慎

黃滔律賦如明皇回駕經馬嵬云日慘風悲到  
玉顏之死處花愁露泣認朱臉之啼痕褒雲萬  
疊斷腸新出于啼猿秦樹千層比翼不如於飛  
鳥景陽井云理昧納隍處窮泉而詎得誠乖馭





Red seal impression.

